

iritzia

gaurko...

...elkarriketa



Andra Mari Uribesalgo

• 'GUGAZ AURRERA'
HEZKUNTZA ELKARTEKO
ARDURADUNA •

«Ohiko hezkuntzatik at dauden arloak lantzen ditugu»

Bilboko Udalak bultzaturik, DBHko ikasleentzako udako eskola berezia abian jarri du elkarrekin.

■ Zer irakatsi nahi die-zue ikasleei?

Gure udako eskolaren xedea ez da ikasgai jakin batzuk lantzea, iraileko azterketarik jadanik ez dagoelako. Horren ordez, ikasteko teknikak jorratzen ditugu, hurrengo ikasturteetan baliagarriak izango zaizkienak; trebetasun sozialak eta, bereziki, ikasteko motibazioa bultzatzen ditugu. Gure programaren interesguneak ekologia, musika, kultur aniztasuna eta integrazioa, pertsonen hezkuntza eta abar dira. Ohiko hezkuntzan pixka bat baztertuta dauden arloak lantzen ditugu.

■ Horretarako ezohiko metodologia darabil-zue, ezta?

Uda ikasteko sasoi zaila dela kontuan hartuta, gure asmoa irakaspenak modu erakargarrian eskaintzea da. Gramatika eta ortografia irakasteko ordenagailua erabiltzen dugu, zinematika eta matematika arinago bihurtzeko adibide praktikoak eraginkorrak dira. Horrez gain, eskolak astunak izan ez daitezten, kirola eta ibilaldiak egiten ditugu eta igerilekuetara eramaten ditugu. Taldea hamar pertsonaz osatua da, eta horrek ahalbidetzen du metodologia berri horri jarraitzea.

Kristina Martin
BILBO

...esaera

«Ahaztua, ez eskertua, ez ordaindua»

...hizpideak

Heriotza zigorra Abdullah Ocalanen kontra

■ «Egoera berezian» egin dela Abdullah Ocalan PKK Kurdistango Langileen Alderdiko buruzagiaren aurkako epaiketa onartu du Europako Batasunak, nahiz eta jarraian legezko prozedura egokia izan dela aitortu. Ocalanen heriotza zigorra dela eta EBk hartu duen jarreraren antzekoa hartuko dute gainontzeko herrialdeek ere, baina ikusteko dago protesta horrek, interesak interes eta presioak presio, zer lortuko duen.

«Traizioagatik eta Turkiako lurralde batasunari erasotzeagatik» zigortu du Estatuaren Segurtasunerako Auzitegiak Ocalan. Epailearen arabera, «milaka errugaberen heriotzaren erantzule» da PKK-ko buruzagia, eta hori dela eta merezia du hiltzeko kondena.

Ocalanek epaiketa osoan zabaldu duen mezua errepikatu zion atzo auzitegiari, baina bere hitzak alferrik entzun ziren Irmali espetxeko aretoan. PKK-ko buruak «herri turkiarraren eta herri kurduaren arteko bakea eta aniztasuna» bultzatzeko eskatu zuen eta prest azaldu zen horren alde lan egiteko. Ocalanek ukatu zuen traizioa egin izana: «Ez nuen Errepublikaren aurka egin, errepublika demokratiko baten alde baizik».

Ondoko egunok erabakigarriak izango dira Abdullah Ocalanen patua erabakitzeko, eta nazioartearen presioak eragina izan dezake. Izan ere, Turkiako Herriaren Alderdi Demokratikoak esan duenez, «Ocalan hiltzeak ez dio lagunduko kurduen arazoa konpontzeari».

Indarrak neurtzen

■ Richard Virenque Polti taldeko txirrindularia eta Manolo Saiz ONCEko zuzendaria Tourrean izango dira, Nazioarteko Txirrindularitza Batasunak (UCI) hala agindu ostean. Jean Marie Leblanc buru duen Tourreko zuzendaritzak atzera egin du, UCIren erabakia erabat gaitzesten duela esan ondoren. Nazioarteko txirrindularitzan norgehiagoka gogorra dago. Gaurkoa beste *round* bat izan da.

EITBk badu zuzendari nagusia

■ Kostata, baina azkenean izendatu du Eusko Legebiltzarrak EITBren hurrengo lau urteetako kudeaketaren arduradun nagusia: Andoni Ortuzar.

Hilabete hauetan guztietan hautagaiaren euskaraz jakite mailak zer esan franko eman du; agerian utziz, aurrerapean aurrerapen, zein urrutit gauden oraindik —batzuk besteak baino gehiago— normalizazio egoeratik. Adierazgarria delako entea sortu eta ia hogeit urtera eztabaidan

jardutea zuzendari nagusiaren euskaraz maila nahikoa den edo ez. EITB enblematikoa da euskararen alorrean, eta hori kontuan hartu beharra zeukan proposamenaren egileak.

Herri honetan milaka lagunek ikasi dute euskaraz hutsaren truk, inongo kargurik eskaini behar izan gabe. Euskalduntze prozesuak sinesgarritasuna eta ereduagarritasuna behar ditu ipar, ez hilabeteotan ikusi duguna.

...pertsonaiak



MAITANE SAGASTUME •

Martuteneko espetxean haurra izan ondoren, Dueñasera eramana zuten, Martutenen amentzako modulatorik ez dagoela esanez. Dueñasen, ordea, ez diote uzten haurra ziegan edukitzen.



FARUK DORU •

Kurdistanen Askapenerako Fronte Nazionalako ordezkariaren arabera, Abdullah Ocalan PKK-ko buruzagia exekutatu egingo dute

EEBBek eta Europak presio zorrotza egiten ez badute.



JULIO SALINAS •

36 urteko aurrelariak Alaves taldean jarraituko du hurrengo denboraldian. 144 gol sartuak ditu Espainiako Futbol Ligan, eta sei liga irabazi ditu.

...datua

25 urte bete ditu Tirri-Tarra fanfarreak. Urteurrena ospatzeko asmoz, *Re + fa* diskoa kaleratu du, zortzi abestirekin. Kanta guztiak Sergio Zurutuza *Pepi*-k ondu ditu.

...adierazpena

«100 urte harrapatuko ditut ez dakidalako zer den aspertzea.
Ilusioa dut»

Compay Segundo
Kubako musikaria

... seiko urrea

XABIER OLEAGA

Inkoherentziak

H auteskundeetako emaitzak gobernu instantziak osatzen eraman behar diren ariketa bitxiak suertatzen dira, baita gaitzak ere. EAJk eta EAK euren akordioa egin zuten bere garaian hauteskundeetara elkarrekin joanez beste aukera batzuk baino gehiago izateko. Egia esan, hori partzialki bakarrik gertatu da. EHri zenbait alkatetza eta Gipuzkoan Diputazioa kentzeko balio izan du, baina ez du inon balio izan PPri edo PSOERI indarra kentzeko. Orain EAJk eta EAK akordioa sinatuko omen dute PSOE-rekin botorik gehien duen alderdiaren nagusitasuna errespetatua izan

dadin alkatetzak eskuratzerako orduan.

Kontua da ez dela hor bukatzen ariketa, zeren eta alkatetzak eskuratu ondoren, nola osatuko dira Gobernu Batzordeak? Gerta daiteke, esate baterako, gobernu batzorde bat osatzea PSOE, EAJ eta EAK artean, lehen bezala kanpoan utziaz EHko ordezkariak, nahiz eta azken alderdi hori udaleko bigarren



indar elektoralak izan? Gasteizen lagun, zenbait udaletan otso, gerta daiteke kontraesan eramanezinak sortu gabe?

Gero, PSOEk dio Euskadiko Autonomi Erkidagoan (EAE) ez duela hitzarmenik egingo PPri aginterik kentzeko. Espainiako Konstituzioa defendatzearen printzipiopean babestu du jarrera hori. Galizian, ordea, PSOEk Konstituzioaren aurka

nabarmenki diharduen BNGkoekin adostasun progresistak burutu ditu PPri alkatetza batzuk kentzeko.

Eta behin inkoherentzien lezean murgilduz gero, Mayor Orejak Ibarretxeri eskatu dio, berriro ere, EHrekin hausteko, hark kale borrokako ekintzak salatzen ez dituelako. Mayor Orejak, nioen, iragarri du ordea Madrilgo PPren Gobernuak aurrera jarraituko duela ETarekiko kontaktuetan —eta ez diot nik hori kritikatu—, nahiz eta kale borrokak bere horretan iraun.

Iritzi publikoa politikaz ezer ulertu ezinean dabilela eta, norbaitzuk harriturik omen dabiltza.